



15. april 2024

UPA2024/130

Siumumiit siunnersuuteqartoq Doris J Jensen Inatsisartut Suleriaasianni § 33 malillugu siunnersuuteqarneranut qutsavigaarput.

Siunnersuutigineqartoq imatut qulequtaqarpoq; **Inuussutissarsiutigalugu aalisartut piniartullu ikiorserneqarnissamik inatsisitigut periarfissaat aammalu kommunimi allaffissornikkut kingunerisassai pillugit Naalackersuisut nassuaanissamik peqquneqarnissaannik Inatsisartut aalajangiiffigisassaattut siunnersuut.**

Siumumiit siunnersuuteqartup toqqammavilersuutigisai oqariartuutigisai ilumoortuusut naqissuserusuppavut.

Ukiut makkua aalisartut piniartullu nappaammik eqqugaallutik piffissami sivikinnerusumi sivilunerusumilluunniit inuussutissarsiutiminnik ingerlatsisinnaajunnaaraangamik kommuninut saaffiginninnerminni siunnersuuteqartup oqariartorneratut saaffiginnittumut nassuaasersornertaqanngitsumik itigartitsinnartarput. Kommunimiik kommunimut assigiinngiaartorujussuarmik ikiorsiiniarnerit ingerlanneqartarlutik.

Naak ikiorsiiniarnermi saaffiginnittunut Inatsit toqqammaviususaaq ataasiinnaagaluartoq (**pisortanit ikiorsiissutit pillugit inatsit nr.6, ulloq 20.juni 2022, kapitali 4 §12**). Tassa inatsimmi ikiorserneqarnissaminnik pisariaqartitsisunut periarfissiissutigineqartut saaffiginnittunut tamanut assigiimmik atuutsinneqartussaapput. Kisianni saaffiginnittumiik saaffiginnittumut aalisartuuppata piniartuuppatalu allatut isigineqartussanngoreertarput, immikkoortitaasutut assigiinngisitaasutullu misigineqarsinnaasumik ikiorserneqarnissaminnik itigartinneqaannartarput. Tamanna ukiut tamarluinnaasa tusartarparput.

Uffa massa nunatsinni aningaasalersuinerpaajugaluartut. Saaffiginnittummi asuli saaffiginninneq ajorput, pisariaqartitsilluinnaleraangamik saaffiginnittarput. Taamaakkaluartoq ikiorsiisoqanngiivittarluni piffissami qanoq sivilutigisumilluunniit aalisarnikkut piniarnikkullu aningaasarsiorsinnaanerminnik napparsimanertik pissutigalugu isertitaqanngivikkaluaraangataluunniit.

Siunnersuuteqartup siunnersuutaanut Naalackersuisut akissutaannut qutsavigaavut. Akissuteqaammi erseqqissarneqarpoq inatsit pisariaqartitsillutik saaffiginnittunut, ikiorserneqarnissaminnillu inatsit malillugu periarfissamik assigiinngisitsinani atuutsinneqartussaananeramik erseqqaarissumik tikkuussimmat.

Aammalu Siumumiit iluarisimaarparput Naalackersuisut Kommuninut pikkorissaallutillu inatsisip qanoq paasineqartariaqarneranik qanorlu atuutsinneqartariaqarneranik sulisunut



pikkorissaallutillu pisariaqartitsisunut siunnersuinerit ataavartumik ingerlannerarmatigit. Tamakkualu saniatigit pisortanik ikiorsiissutit pillugit Majoriamut ilitersuusiorlutik naalackersuisoqarfik suliaqarnerarneqarmat.

Siumumiillu Naalackersuisut akissummini Isumaginninnermi Naammagittaalliuteqartarfik periarfissatut innersuummagu isumaqatigilluinnarparput. Tassami tamatta assigiimmik pisinnaatitaaffeqarluta maani nunami najugaqarpugut. Taamaattoq ilisimaaraarput naammagittaalliummik ingerlataqaraanni piffissamik sivisuumik utaqqisinnaaneq malitsigisinnaagaa. Aammalu siunnersuummi qitiutinneqartunit periarfissaq atorineqartillugu tusarsaavallaassanani, immaqalu periarfissaaneraluunniit ilisimaneqarani.

Sulinnigiffeqarallarnermi ikiorsiissutit atuuttarput ikiorneqarusuttoq suliffissarsiortutut nalunaaruteqaraangat. Tamanna sinerissap qanittuani aalisartunut piniartunullu ima paasineqarajuttarpoq, taava aatsaat nunamiunngoqqaartariaqarnermik aamma namminersortutut ingerlatsiunnaarallarnissamik. Aporfik taanna, ukiut tamaasa utikajaartumik oqaluuserisartagarput, pimoorullugu aaqqiissuteqarfiginiarlugu aallartittariaqartugut Siumut isumaqarpoq. Pineqartummi namminersortuupput, taamaakkaluartorli aamma silaannaap allanngoriartorneranik piniagassallu ingerlaarfigisaasa allanngortarneranik eqqugaasarput. Taamaattumik Kattuffiit susassaqartut suleqataanissaat pinngitsoorneqarsinnaanngitsoq Siumut isumaqarpoq.

Apeqqut akisassarput tassaavoq pineqartut nunamiunngunngikkaluarlutik namminersortuunerminnullu annaassaqanngikkaluarlutik pisariitsumik qanoq ulluni ajornartoorfinni ikiorneqarsinnaanngornissaat.

Siumut isumaqarpoq suliassaq taanna aatsaat Kattuffiit susassaqartut suleqatigalugit aaqqiivigineqarsinnaasoq, assersuutigalugu aaqqissuussamik aningaasaateqarfiliornikkut allatulluunniit naammaginartumik aaqqiissuteqarnikkut.

Taamak oqaaseqarluta siunnersuuteqarpoq taperserparput, isumaqarpugullu apeqqut taamak tamatsinnut pingaaruteqartigisoq Aalisarnermut, Piniarnermut Nunalerinermullu Ataatsimiititaliami sukumiisumik qulaajaavigalugulu eqqartorneqartariaqartoq.

Ajornartorsiut uteqqiasumik ukiut tamaasa nalaattaligarput tamanut naammaginartumik aaqqiivigissallugu pisussaaffeqartugut Siumut isumaqarpoq.

Karl Tobiassen
Siumut